

## Morning Dogri (NSD) National News Bulletin 04-05-2025

- समुंद्री निगरानी बधाने लेई अमरीका नै भारत गी हॉक आई 360 दी बिक्री गी मंजूरी दित्ती।
- नीट यूजी 2025 मतेयान अज्ज भारत ते 13 विदेशी शौहरें च बनाए गेदे 5000 शा बद्ध केन्द्रें पर लैता जा'रदा ऐ।
- मास्टर क्लासें ते सांस्कृतिक कार्यक्रमें कन्नै मुंबई च वेक्स 2025 शिखर सम्मेलन अज्ज सम्पन्न होई जाग।
- बद्रीनाथ धाम यात्रुएं लेई खोली दित्ता गेआ ऐ, एहदे कन्नै श्रद्धालु उत्तराखंड दे चौने तीर्थ थाहरें दी यात्रा करी सकगन।
- सिंगापुर दी पॉप पार्टी नै 87 सीटें कन्नै 66 ब'रे दे शासन गी अगगे बधदे होई शानदार जित्त हासल कीती ऐ।
- बिहार च खेलो इंडिया-2025 यूथ गेम्स दी अज्ज शुरुआत होआ करदी ऐ। आकाशवाणी उद्घाटन समारोह दी अंक्खी दिक्खेआ हाल प्रसारत करोग।



### US-Hawk Eye

अमरीका नै भारत दी सुरक्षा प्रणाली गी होर मजबूत करने आस्तै हॉक आई 360 तकनीक दी बिक्री गी मंजूरी देई दित्ती ऐ। एहदे कन्नै हिंद प्रशांत खेत्तर च भारत दी सिीति निग्गर होग। अमरीका दी प्रतिरक्षा सुरक्षा सैहयोग अजेंसी नै आखेआ ऐ जे हॉकआई 360 तकनीक कन्नै भारत मजूदा ते भविक्ख दी चुनौतिएं दी बेहतर तरीके कन्नै मकाबला करी सकग। हॉकआई 360 च पृथ्वी दी हेठली कक्षा च स्थित उपग्रह दा उपयोग कीता जंदा ऐ। एह तकनीक गैर कनूनी गतिविधिएं दा पता लाने ते विशेष आर्थिक जोन पर नजर रखने च कारी दी साबत होग। 13 करोड़ रपे कोला मती लागत आली एह तकनीक रेडियो फ्रीक्वेंसी सिग्नल दा पता लाने च मददगार ऐ। इस तकनीक कन्नै विवादित खेत्तरें च छप्पियै कम्म करने आले पोतें दा पता बी लाया जाई सकदा ऐ।



## NTA

अज्ज देश भर च मैडिकल प्रवेश परीक्षा—नीट यूजी आयोजित कीती जा'रदी ऐ। एह परीक्षा विदेशों च 13 शैहरें सनें 5 ज्हार थमां मते केन्द्रें पर दपैहरी 2 बजे शा लेइयै 5 बजे तगर लैती जाग। राष्ट्री परीक्षा अजेंसी एनटीए दे मताबक परीक्षा लेई 22 लक्ख शा मते विद्यार्थिएं पंजीकरण कराए दा ऐ। एनटीए नै आखेआ जे परीक्षा समग्री दी उपलब्धता दे सरबंधें च गलत जानकारी देने आले 165 कोला मते टेलीग्राम चैनलें ते 32 कोला मते इन्स्टाग्राम चैनलें पर कारवाई कीती गई ऐ। एनटीए नै विद्यार्थिएं गी झूठिएं सूचनाएं पर ध्यान नेई देने ते एनटीए दी वैबसाइट पर उपलब्ध सूचना पर गै भरोसा करने दी अपील कीती।



## Waves-Last Day

मुंबई च इसलै चला'रदे वेवस शिखर सम्मेलन अज्ज संपन्न होआ'रदा ऐ। अज्ज खीरले ध्याड़े फिल्म निर्माता पर किश सत्र ते सांस्कृतिक कार्यक्रम बी होंगन। चऊं दिनें दे इस सम्मेलन दा उद्घाटन प्रधानमंत्री नरेन्द्र मोदी होरें कीता हा। एह आयोजन भारत गी मीडिया, मनोरंजन ते डिजिटल नवाचार दे वैश्विक केन्द्र दे रूपै च स्थापत करने दी कोशश ही। आयोजन च 90एं शा मते देशें दे 10 ज्हार शा ब0 प्रतिनिधि शामिल होए।



## Badrinath Dhaam

उत्तराखंड दे चमोली जिले च अज्ज बद्रीनाथ धाम दे कपाट पारंपरिक तरीके कन्नै पूजा अर्चना करने परैत भक्तें लेई खोली दित्ते गे। एहदे कन्नै गै हुन उत्तराखंड च कैदारनाथ, गंगोत्री ते यमनोत्री सनें चौनें घामें दे कपाट श्रद्धालुएं लेई खुली चुके दे न। इस मौके पर मिल्ट्री बैंड दिए धुनें मन परचाई लैता ते "जय बद्री विशाल" दे जयकारे कन्नै समूलचा मंदर परिसर गूंजी उट्टेआ। इस ब'रे मंदर प्रशासन नै तीर्थ यात्रुएं दी सहूलत ते सुरक्षा गी बघां दे होई टकोहदे प्रबंधें कीते दे न। एहदे अलावा गड्डिएं दी निगरानी ते सुरक्षा गी जकीनी बनाने आस्तै पुलस जवान थाहरें—थाहरें पर सीसीटीवी कैमरें बी लाए गेदे न।



## Dr. Jai Shankar

विदेश मंत्री डॉ. जयशंकर होरें अपने रूसी जोड़ीदार सर्गेई लावरोव हुंदे कन्नै पहलगाम आतंकी हमले पर चर्चा कीती। सोशल मीडिया पोस्ट च डॉ. जयशंकर होरें आखेआ जे उनें इस गल्ला पर चर्चा कीती जे आतंकवादी हमले दे दोषिएं, उंदे समर्थकें ते एहदी योजना बनाने आलें गी न्याह दे कटघरे च आन्नना लोड़चदा ऐ। इस दरान दौनें लीडरें भारत-रूस दपक्खी सैहयोग गतिविधिएं बारे बी गल्लबात कीती।



## Pak Ban

पहलगाम आतंकी हमले दे बाद प्रतिक्रिया दे तौरा पर कीती जा'रदिएं कारवाइएं दे सिलसिले गी जारी रखदे होई भारत नै पाकिस्तानी समुंद्री जहाजें दे भारतीय बंदगाहें च दाखल होने जा इत्थुआं जाने पर बंदश लाई दित्ती ऐ। एह फैसला भारतीय संपत्ति, समेयान ते सरबंधत ढांचे दी सुरक्षा गी जकीनी बनाने लेई लैता गेआ ऐ। जहाजरानी सरबंधी महानिदेशालय दा आखना ऐ जे एह रोक अगले हुक्मै तोड़ी जारी रौहग ते जित्थें कुतै एहदे च छूट देने दी लोड़ नेई कीती जाग, तां मामले दी गंभीरता गी दिखदे होई दित्ती बी जाई सकदी ऐ। एहदे इलावा भारत नै पाकिस्तान कन्नै जियां जे पैहले बी खबर दित्ती जाई चुकी दी ऐ, डाक सेवा ते आयात पर बी बंदश लाई दित्ती दी ऐ। केन्द्र सरकार दे इस फैसले दा मुख्य भरै च सुआगत ते समर्थन कीता जा'रदा ऐ। जम्मू दे बपारिएं बी इस फैसले दी सराहना कीती ऐ ते आखेआ ऐ जे बन्ने पारा चलाए जा'रदे आतंकवाद खलाफ एह कारवाई इक जरूरी गैह ऐ। बपारिएं दा आखना ऐ जे देसे दी सुरक्षा कोला उप्पर कोई कारोबार, बपार दा फायदा नुक्सान नेई होइ सकदा।



## Singapur

सिंगापुर च सत्ताधारी पीपल्स एक्शन पार्टी नै इक बारी परतियै आम चुनां च भारी जित्त दर्ज कीती ऐ। एह पार्टी पिछले 66 ब'रे थमां सत्ता च ऐ। प्रधानमंत्री लारेंस वोग दी पीपल्स एक्शन पार्टी गी 97 चा 87 सीटां हासल होइयां ते विपक्षी वर्कसें पार्टी छोड़ियै 10 सीटां गै जित्ती सकी। इस चुनां च पीपल्स एक्शन पार्टी गी 65 फीसदी कोला मते वोट मिले। 2020 दे चुनां च इस पार्टी गी 61 फीसदी वोट मिले हे।



## President

राष्ट्रपति द्रौपदी मुर्मू होरें आखेआ ऐ जे भारत सब्बने अफ्रीकी देश कन्नै आपसी लाभकारी ते स्थाई भ्याली आस्तै प्रतिबद्ध ऐ। राष्ट्रपति मुर्मू होरें राष्ट्रपति भवन च अंगोला दे राष्ट्रपति जोआओ लॉरेंको हुंदे कन्नै मलाटी कीती ते उंदे सम्मान च रातीं आली रूट्टी दा आयोजन कीता। राष्ट्रपति होरें आखेआ जे अंगोला समेत सब्बने अफ्रीकी देशें कन्नै भारत दे निग्गर सरबंध ऐन। उनें अफ्रीका च शांति, सुरक्षा ते स्थिरता च अंगोला दी भूमका दी सराहना कीती। राष्ट्रपति मुर्मू होरें एह बी आखेआ जे आतंकवाद मानवता आस्तै इक गंभीर संकअ ऐ ते एहदी स्पष्ट रूपै कन्नै निंदेया कीती जानी लोडचदी ऐ। राष्ट्रपति होरें जम्मू कश्मीर दे पहलगाम च हाल च होए दे आतंकी हमले पर राष्ट्रपति लॉरेंको हुंदी सहानुभूति ते आतंकवाद दे खलाफ समर्थन दी बी सराहना कीती। दवै नेताएं दवै देशें दे लोकें दी तरक्की ते कल्याण ते विकासशील देशें आस्तै मिलियै कम्म करदे रौहने पर सैहमति जताई।



## Railway

रेलवे नै चारधाम यात्रा आस्तै भारत गौरव डीलक्स ट्रेन दी शुरूआत कीती ऐ। एह रेल गड्डी बद्दीनाथ, जोशीमठ, ऋषिकेश, पुरी, कोणार्क, रामेश्वरम ते द्वारका दे कन्नो कन्नी काशी, विश्वानाथ, भीमशंकर ते त्रयनकेश्वर दी यात्रा आस्तै शुरू कीती गई ऐ। ट्रेन इस म्हीने दी 27 तरीक गी दिल्ली दे सफदरजंग रेलवे स्टेशन थमां रवाना होग ते 17एं दिनें च चार धाम समेत होरने धार्मिक स्थल दी यात्रा पूरी करोग। ट्रेन दी टिकट पैहे आओ, पैहले पाओ दे आधार पर रेलवे दी वेबसाइट पर बुक कीती जाई सकदी ऐ।



## Khelo India

खेलो इंडिया यूथ गेम्स 2025 अज्ज बिहार दे 5एं शैहरें च रंभ होआ करदियां न। एह शोहर न पटना, राजगीर, गया, भागलपुर ते बेगूसराय चुनिंदा मकाबले नमीं दिल्ली च आयोजित कीते जांगन। आकाशवाणी खेलो इंडिया यूथ गेंस 2025 दे उद्घाटन समारोह दा बक्खी दिक्खेआ हाल सिद्धा प्रसारत करोग। कार्यक्रम संजा 5 बज्जियै 55 मँट पर रंभ होइयै साढ़े 7 बजे तगर जां फही समारोह दे खीरै तगर जारी रौहग। एह न्यूल ऑन एयर ऐप, प्रसार भारती स्पोर्ट्स, यूट्यूब चैनल ते डीटीएच सेवा पर बी उपलब्ध रौहग।



### **LoC Firing**

भारती सेना नै कल रातीं कब्जा रेखा पर पाकिस्तानी सेना आस्सेआ कीती गेदी गोलीबारी दा असरदार तरीके कन्नै परता दित्ता। रक्षा सूत्रें दस्सेआ जे पाकिस्तानी सेना नै केन्द्र शासत जम्मू कश्मीर दे कुपवाड़ा, उड़ी ते अखनूर सेक्टरें च कब्जा रेखा पर बिजन कुसै उकसावे दे लौहके थेआरें कन्नै गोलीबारी कीती जेहदा भारती सेना नै पूरी तगड़ेयाई कन्नै बनकदा परता दित्ता।

